

per andarse con Dio. El papa ha chiamato l' orator di Spagna, et ge à dito ch' el scriva al suo re, che se l' à paura, che 'l foglij le sue zente a suo piazer, e che lui farà vegnir tanta zente in Italia, che 'l farà tremar tuto el mondo. *Nec plura.*

78 *Copia di lettere di sier Pelegrim Venier, quondam sier Domenego, date in Palermo, a dì 14 april 1511, et drizzate a la Signoria nostra; ricevute a dì . . . . dito.*

Per l' ultime mie, *serenissime princeps et domine, domine semper colendissime*, significai vostra sublimità di le nove de qui si havia; et partendosi uno brigantinò per Napoli, ho terminato far la presente, con farli intender, come, per lettere di Barzelona, de primo de l' instante, universalmente tutti scriveno, la catholicha majestà, per mezo mazo, doversi transferir de qui, over in Reame; et in Carthagenia, sopra l' armada, montar dovea. Et, con sua alteza, dicono venir tutti li grandi de Castilia, vechij et zoveni. Per governo del regno lassa il reverendissimo arziepiscopo di Toledo, cardinal, lo conte di Modicha, lo arziepiscopo di Saragoxa, fiol di suo majestà; et il gran contestabele, *olim* suo zenero, se ritrovava in Sibia, et in Granata andar dovea. Et in quella cità resta la serenissima regina, sua fiola, et a Valenzia la regina mandava a star, fino al ritorno de suo majestà. A referir quello scriveno molti, *fide digni*, serenissimo principe, par cosa incredibile, perhò vostra serenità ne farà il judizio li parerà. Narano, da 300 nave da 100 toneli in supra, haverà sopra homeni X milia da cavallo, et 30 milia pedoni; venia e per Tunis, danno la fama, e *diversimode* si fa judicij. De qui *continue*, per tuti questi caricatori, si fano far biscoti, farine et altre qualità de vituarie, quante far puoleno, et cussi prepreparar salnitrij, et polvere cantera 1200, et in Endalutia et per l' armada portano vituarie assaissime; e il conte Petro Navaro, con barze X et altre caravele, è a la Fagagnana, con fanti 1000 in zercha, si ritrova, per hordine di la catholica majestà ritornato; et li have da redur tuta l' armata, per costi si parla. Si atende lo illustrissimo signor vice re di Napoli con armada e cavali, e fanti bon numero, et de qui nel regno si ha fato la description di homeni da fati di le arme, et, passati questi zorni, tutti farano le mostre, qui e per tuto. Da Barzelona era stà mandato in Carthajenia ducati 60 milia per pagar le fantarie, et in Aragona, Valenzia et quelli regni erano iti diverssi capetanei per far fantarie; et

botazi di cuoro per li pedoni, numero infinito ordinavasi, oltra li altri soliti aparati et pressidij; et questo è quanto de qui se intende, che sia degno di relation di vostra signoria; e quel più si rihaverà, quella ne sarà avisata. Fanno provixiom di mandar orzi assai per Trapano; et zerte charachie di Zenoa, de qui nel regno s' atrovano, sono interditi li lhor viagi, et per el simile par sia in Zenoa et Riviera, chè tute nave e barze doveano venir a cargar. De ritorno sono stà retenuto per Franza, dil qual non mi extendo in dirli altro. Da Tripoli, per lettere, di 28 dil passato, pativano *super modum*, da pan indriedo, de ogni cossa, *maxime* di bone aque; il campo perhò di poco numero d' intorno la citade, et haveali roto li conduti di le aque, andavano in Tripoli; e poi certi fanti, havia voluto sachizar la terra, fonno scoperti, et più di 100 im poter de' inimici, si sono fuziti e renegati. De qui al continuo li è provisto dil possibile, et il governo di quella citade, soto questo illustrissimo signor vice re, di tutto è stà dato; il nostro signor Dio suplico, doni incruenta vitoria contra li inimici di santa sede a questa catholicha corona e con salute. *Ubique* si judicha, per li primj, la persona sua de facili restar debi; di quanto seguirà, vostra signoria lo intenderà. De qui formènti tari XI in zercha, la saxon bona; orzi tari X. Le trate, per luogi di vostra excelentia, à l' usato. A' comandi de vostra illustrissima signoria, presto Idio la exalti et conservi.

*Sumario e copia di una altra lettera dil dito, di 19 april, ricevuta a dì . . . . dito.*

Sapiate, da la Fagagnana e de qui vien mandà per Napoli barze 6 e una nave de porta' de salme 400, a levar cavali, dicono per la Barbaria; e di continuo si preparava vituarie e munizion, summa infinita, per la venuta di la catholicha majestà con potentissima armada e numeroso exercito, qual, per 1/2 mazo, in Carthagenia inbarchar se dovea; è fama, per Barbaria, altri dicono per Italia, e ogniun dice la sua. Àse dito, l' armada, se fa in Zenoa e Riviera, esser per conzonzerse con questa del catholicho re; Idio per tuto provedi. È da star ben provisti a saper veder quel ocherer puol, e una drama di fede aver. Fanno polvere di bombarde assai, botami, cha rare peze de formazi, numero infinito. De qui si dize, a la Valona esser 7 sanzachi, perhò non se stima. Di Reame se atende el signor vice re con cavali 1200, e, per tutto il regno, ogniun si mete in hordine. Nave e navilij di ogni qualità son retenuti,